

NOBILISSIMO DOCTISSIMOQUE  
IOANNI GERLACO  
EVTENNEVERO

S. P. D.  
IO. GEORGIUS WALCHIVS,  
ELOQVENTIAE ET POESEOS  
P. P. O.

Qui honestis studiis ad ingenii decus contendunt rectamque morum disciplinam pro eo, ac par est, sequuntur, industriae huius suaviorem capiunt fructum ac merito impetrant testimonium laudi, qua probus praecipue animus semper viget, consecratum. neque id non agnovisti, qui toto studiorum cursu singulare virtutis ornamentum servasti, nec solum prudenter litteris dedisti operam, sed & pietatem, modestiam, temperantiam, a quibus iuventus saepe aliena est, magna mentis contentione secutus. cuius industriae, quam ingenii culturae consecrasti, praesens dissertatio, & argumenti dignitate & scribendi ratione praecleara exhibet specimen; mores autem tuos optimos, per quos voluptates & illecebrae a conspectu & consuetudine tua longissime semper abfuerunt, mecum in iisdem aedibus per tres annos coniunctus mihi satis probasti. quo vitae instituto observasti, carissime EVTENNEVERE, quod graviter dixit ANTISTHENES, tales esse studiorum rationes, ut a cultu vitae haud possint separari; sed apte sibi congruant morumque similitudine ex consensu, velut vinculo quodam coniungantur. quare Tibi gratulor toto animo, in spem adductus firmiorem, fore, ut diuinis auspiciis patriae in coetus diuiniorem salutem atque incrementa multa adferas commoda, menteque Tua ad summum numinis voluntatem vnice composita, res Tuas explices felicissime. augebis multa accessione has laudes, pietatem atque industriam firma tenebis possessione, quod ut fiat, precor Tibi semper caelestem benignitatem, qua vires & corporis & animi corroborari atque augeri possunt. Ienae d. XXVIII. octobr. anno instaurationis salutis MDCCXXI.